



Shaleen Surtie-Richards is met 'n amptelike provinsiale begrafnis gegroet.

Foto's: JACO MARAIS

SURTIE-RICHARDS GEGROET

‘Deur die stelsel in steek gelaat’

Afsterwe ‘moet ’n wekroep wees’

Marelize Barnard

Shaleen Surtie-Richards was geliefd onder mense, maar is deur die stelsel in die steek gelaat.

Op die roudiens gistermiddag vir Surtie-Richards (66) in Durbanville, Kaapstad, het haar jare lange vriend Rifát Browsers dié sterk boodskap gelewer.

Browsers het spesifiek verwys na Nathi Mthethwa, minister van sport, kuns en kultuur wat teenwoordig was, en ’n beroep op hom gedoen dat die langlewendheid van mense in die kuns- en vermaakwêreld verseker word.

Ook Patricia de Lille, minister van openbare werke en infrastruktuur, het in haar boodskap gesê dit is hartseer dat Surtie-Richards se dood die stryd van Suid-Afrikaanse kunstenaars in hul later jare blootlê.

De Lille, wie se boodskap voorgelees is, het gesê Surtie-Richards se dood moet ’n wekroep wees dat kunstenaars en hul regte beskerm en gerespekteer moet word.

“Daar moet na hulle omgesien word,” het De Lille gesê.

Die roudiens is by Memorial



Shaleen Surtie-Richards se kis is in die landsvlag gedrapeer in haar roudiens in die kapel van Memorial Park in Durbanville.

Park in Durbanville gehou, en die ikoniese aktrise het weer in voorkamers op televisieskerm verskyn met die diens wat landwyd uitgesaai is.

Eerw. Lionel Surtie, Surtie-Richards se broer, het die diens geleidelik.

Hy het gesê sy suster het “in die skadu’s van Tafelberg kom rus”.

Surtie het gesê die boodskap wat hy namens Surtie-Richards wil lewer, is dat mense nie bang moet wees vir die lewe nie.

“Vrees is die oudste en sterkste menslike emosie en dit verlam ’n mens. Dit maak jou siek en verlam vandag die krag wat jy môre nodig het om die onheil aan te durf.”

Die swaarste las is vrees vir dinge wat uiteindelik nooit gebeur nie.

“Wanneer vrees aan die deur

“

Sy het ons meer geleer van onself, van dit wat ons ware Suid-Afrikaners en ware mense maak. Niemand sal twyfel in die rol wat Shaleen gespeel het om mense te verenig nie.

— Nathi Mthethwa

klop, stuur geloof om die deur oop te maak en jy sal vind daar is niemand nie,” het Surtie gesê.

In sy boodskap het Mthethwa

gesê Surtie-Richards was op verskeie maniere ’n verteller van stories. Sy was die beste storieverteller deur al die karakters wat sy uitgeleef het.

“Sy het ons meer geleer van onself, van dit wat ons ware Suid-Afrikaners en ware mense maak.

“Niemand sal twyfel in die rol wat Shaleen gespeel het om mense te verenig nie.”

Hy het gesê Surtie-Richards het mense geleer om trots te wees op wie jy is en van waar jy kom.

“Shaleen, jy het gesterf sonder om te groet, maar jy leef voort in ons geheue,” was Mthethwa se afskeidswoorde.

Michelle Surtie de Bruyn, Surtie-Richards se niggie, het namens die familie ’n huldeblyk gelewer en gesê sy moes op haar tannie se 60ste verjaardag ’n toespraak lewer. Daar was bekendes op die geleentheid.

Surtie-Richards het haar eenkant toe geroep en gesê: “Jy is ’n Surtie, jy is jou pa se kind. Moenie vir jou *worry* oor die mense nie. Ons is die mense. Jy lig jou ken op en jy praat.”

Surtie-Richards se kis is as deel van die amptelike seremonie in ’n landsvlag gedrapeer nadat pres. Cyril Ramaphosa ’n amptelike provinsiale begrafnis goedgekeur het.

Die kapel was met wit en rooi blomme versier en een van die rose wat uitgestaan het, was ’n roos wat na haar genoem is.

Kerse is deur Estée Lauder geskenk sodat mense ook kon onthou hoe lief Surtie-Richards vir parfuum was.